

Najukkani nunalerinikkut tunisassianik tuniniaanerup annertusarneqarnissaanut atugassarititaasut pitsaanerpaajunissaat qulakkeerniarlugu Naalakkersuisut iliuusissatut pilersaarusiornissamik peqquneqarnissaannik Inatsisartut aalajangiiffigisassaattut siunnersuut. Siunissami sulinissamut piffissalersuummik iliuusissatut pilersaarut imaqassaaq Inatsisartunullu kingusinnerpaamik UKA 2020-mi agguaanneqassalluni

AAMMA

Imminut pilersorneq nunatsinni annertusarniarlugu Naalakkersuisut periusissiamik kingusinnerpaamik UKA2020-imi Inatsisartunut saqqummiunneqartussamik suliaqaaqqullugit peqquneqarnissaannik Inatsisartut aalajangiiffigisassaattut siunnersuut. Periusissiaq aamma inatsisitigut aningaasatigullu aporfiit nutartigassat aaqqissuuteqqinnissaannut innersuussutinik imaqassaaq

pillugit

Aalisarnermut, Piniarnermut Nunalerinermullu Ataatsimiititaliap

siunnersuutit aappassaaneerneqarnerannut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Henrik Fleischer, Siumut, siulittaasoq
Inatsisartunut ilaasortaq Aqqaluaq B. Egede, Inuit Ataqtigiit, siulittaasup tullia
Inatsisartunut ilaasortaq Jens Danielsen, Siumut
Inatsisartunut ilaasortaq Steen Lyngø, Demokratit
Inatsisartunut ilaasortaq Múte Bourup Egede, Inuit Ataqtigiit
Inatsisartunut ilaasortaq Hans Enoksen, Partii Naleraq

UKA 2019-imi ulloq 18. oktober 2019-imi siullermeerinninnerup kingorna ataatsimiititaliap siunnersuutit misissorpai.

1. Siunnersuutit imarisaat siunertaallu

1.1 UKA 2019/47

Iliuusissatut pilersaarummik, najukkani nunalerinikkut tunisassianik nunatsinni nunattalu avataani tuniniaanerup annertusarneqarnissaanut atugassarititaasut pitsaanerpaajunissaat qulakkeerniarlugu piffissalersuummik imalimmik, suliaqarnissamut Naalakkersuisut

peqquneqarnissaat siunnersuuteqarnermi kissatigineqarpoq. Iliuusissatut pilersaarutip kingusinnerpaamik UKA 2020-mi naammassineqarluni Inatsisartunut agguanneqarnissaa siunnersuutigineqarpoq.

1.2 UKA 2019/133

Imminut pilersorneq nunatsinni qanoq annertusarneqarsinnaanersoq pillugu periusissiamik suliaqaqqullugit Naalakkersuisut peqquneqarnissaat siunnersuuteqarnermi kissatigineqarpoq. Periusissiami inatsisitigut aningaasatigullu aporfiit allaaserineqassapput kiisalu taakku qanoq iliuseqarfigineqarsinnaanerannut innersuussutinik imaqassalluni. UKA 2020 nallertinnagu periusissiap naammassineqarsimanissaa kissaatigineqarpoq.

2. Ataatsimiititaliap siunnersuutininik suliarinninnera

Siunnersuutit soqutigineqarlutik siullermeerneqarneranni Naalakkersuisunut kaammattuutit arlallit Inatsisartut akimorlugit saqqummiunneqartut ataatsimiititaliamit maluginiarneqarpoq. Siunnersuut una taama iluseqartillugu akuerineqassappat kaammattuutit taakku Naalakkersuisut tikilluaqqullugit sulinerminni sapinngisamik malinniassagaat ataatsimiititaliamit upperineqarpoq.

Periusissiorinissamat/iliuusissatut pilersaarusiornissamat tunuliaqutitut misissuinissami ilaatigut apeqqutit pissutsillu minnerpaamik ilanngunneqartussatut kissaatigineqartut uku siunnersuummik suliarinninnermini ataatsimiititaliap maluginiarpai.

- Misissueqqissaarnernik pioreersunik, assersuutigalugu Nunalerinermut Siunnersuisoqatigiinneersunik, atuinissaq
- Attaveqarnikkut unammilligassat, tassungalu ilanngullugu nunatsinni usinik angallassinermi aningaasartuutit
- Assersuutigalugu "indoor farming"-imik (illup iluani naatitsineq) ingerlatsinissamat nunalerinermut nukissiuutinik pilersuineramik pitsanngorsaaneq
- Nioqqutissat piumaneqarnerannik siuarsaaniarluni iliuutsit
- Najukkani nunalerinikkut annertunerusumik tunisassiorinissamat periarfissanik qulaajaaneq
- Tapiissuteqartarnermik aqqissuussinernik atuuttunik nalilersuineq
- Imminut pilersornerulernissami nunami immikkoortut tamarmiusut akuutinneqarnissaat
- Neqinik, aalisakkanik nunalerinermilu tunisassiornermi akitsorsaataasunik qulaajaaneq
- Inuussutissanik tunisassianik maangaannartitsisoqartarneranik annikillisaaneq
- Nunalerinermi, aalisakkanik uumasunillu tunisassiat atorluarneqarnerunissaat pillugu isumaliutiginninneq
- Nunani tamalaani tunitsivinni nunatsinni tunisassianik nittarsaassinissamat periarfissat
- Nunatsinni tunisassianik nutaanik nunatsinni taamatullu nunani allani niuerfinni ilisarititsinissamat periarfissat

Imminut pilersornerup nalinginnaasumik annertunerulernissaanut aqqissuussaannerusumik periuseqarnerusumillu periarfissanik pitsanngorsaanaissamut pilersitsisinnaasutut aammalu nunalerinermut immikkut nukittorsaataasinnaasutut siunnersuutit matumani pineqartut ataatsimiititaliamit nalilerneqarput. Tamatumani aalisartut, piniartut ataasiakkaat nunalerinerlu eqqarsaatigalugit, aammali minnerunngitsumik nunatta aningaasaqarnera ataatsimut eqqarsaatigalugu.

UKA 2019/47-p akuerineqarnerata tigussaasumik kingunerissavaa minnerpaamik makkununga tunngasumik Naalakkersuisut UKA 2020-mi iliuusissatut pilersaarummik agguaassinissaat:

- Iliuusissatut pilersaarut, najukkani nunalerinikkut tunisassianik nunatsinni nunattalu avataani tuniniaanerup annertusarneqarnissaanut atugassarititaasut pitsaanerpaajunissaannik qulakkeerinnittoq
- **Siuliani allassimasutut siunissamut sammisumik sulinissamut piffissalersuut**

UKA 2019/133-ip akuerineqarnerata kingunerissavaa minnerpaamik makkuninnga imaqartumik Naalakkersuisut periusissiamik UKA 2020-mut suliaqarnissaat:

- Imminut pilersornerup annerulersinneqarnissaanut periusissiaq
- **Aningaasaqarnikkut inatsisitigullu aporfinnik misissueqqissaarneq**
- **Aporfiit siuliani taaneqartut iluarsisutissaannut kaammattuutit**

Naak siunnersuutit pineqartut marluk sulinissamut assigiinngitsunik piumasaaqarfiugaluartut siuliani nalunaarsukkat erseqqissaatigineqartut periusissiorinissamut iliuusissatullu pilersaarusiornissamut suliarineqassasut ataatsimiititaliamit kaammattuutigineqarpoq. Tassa misissueqqissaarnerit suliarineqarnerisa kingorna tigussaasumik piffissalersuuteqarnikkut tigussaasumik iliuuseqarnissaq qitiutinneqarsinnaanerussasoq ataatsimiititaliaq isumaqarmat. Taamaaliornikkut sulinerup unittooratarsinnaanerani aarleqquteqarnissaq annikinnerussaaq. Tamatuma saniatigut nunalerinikkut tunisassianik tuniniaanerup annertusarnissaanut aningaasaqarnikkut inatsisitigullu aporfissat qanoq iliuuseqarfigineqarsinnaanerata iliuusissatut pilersaarummi soorunami isummerfigineqartariaqartoq ataatsimiititaliaq isumaqarpoq. Taamaalillunilu periusissiamik/iliuusissatut pilersaarummik suliaqarneq piffissalersuutissat suliarineqartut aallaavigalugit kingorna piviusumik iliuuseqarnermik suliniuteqarnermillu pilersitsissasoq ataatsimiititaliamit ersarilluinnartumik naatsorsuutigineqarpoq.

Taamatuttaaq piffissaq maangaannartinneqaqqunagu periusissap iliuusissatullu pilersaarutip suliarineqarnerisa naammassinerat ilutigalugu suliniutissat aallartinneqarnissaat ataatsimiititaliamit ersarilluinnartumik naatsorsuutigineqarpoq.

3. Siunnersuutit aningaasatigut kingunerisassaat

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut.

Tamanna naapertorlugu siunnersuutip piviusunngortinnerani aningaasatigut kingunerisassat siunnersuutini nalunaarneqartut ataatsimiititaliamit maluginiarneqarpoq. Taamaalillunilu siunnersuutit tamarmik immikkut ukioq naallugu sulisumik ataatsimik naleqartussatut naatsorsuutigineqarput. Siunnersuutilli marluk tamarmik akuerineqassappata aammalu suliniutini aallartinneqareersuni suliata Naalakkersuisunit ilanngunneqarpata aningaasaqarnikkut kingunerisassat tamarmiusut ikinnerusussatut ataatsimiititaliamit taggineqarput.

4. Ataatsimiititaliap inassuteqaatai

4.1 UKA 2019/47

Siuliani allassimasut tunngavigalugit siunnersuut akuerineqassasoq ataatsimiititaliap isumaqatigiittup inassutigaa.


4.2. UKA 2019/133

Siuliani allassimasut tunngavigalugit siunnersuut akuerineqassasoq ataatsimiititaliap isumaqatigiittup inassutigaa.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.



Henrik Fleischer
Siulittaasoq




Aqqaluaq B. Egede
Siulittaasup tullia




Jens Danielsen



Steen Lyng



Múte Bourup Egede



Hans Enoksen